



Publicaziuns officialas dils 04-10-2019

Annunzias da baghegiar

All'instanza da baghegiar ei sin fundament digl art. 40 dall'ordinaziun davart la planisaziun dil territori dil cantun Grischun (OPTGR) vegniu annunziau suandonts projects:

Nr. 101/2019

Dorothea Derungs, 7172 Rabius; lavurs da manteniment vid scala e mirs dil baghetg nr. 461 sin parcella nr. 153 a Rabius-Cavivens.

Sumvitg, 04-10-2019

Cumissiun da baghegiar

Eleziuns dil cussegl naziunal e dil cussegl dils stans dils 20-10-2019 mira pagina 3 da quest FUS

L'urna ei aviarta (en canzlia communal)

gievgia e venderdis mintgamai duront las uras da spurtegl dumengia, ils 20-10-2019, dallas 10.00 – 11.00 uras

Sonda e dumengia, ils 19 e 20 d'october 2019 mintgamai avon il survetsch divin en las fracziuns.

Ils cedels da votar ein vegni distribui. Tgi ch'ei aunc buca en possess da tals ei supplicaus da s'annunziar tier l'administraziun communal.

Adatg!

Il certificat da legitimaziun ei adina da presentar. Tier votaziuns cun posta ei il certificat da legitimaziun da suttascriber. Senza suttascripziun ei la votaziun nunvaleivla. Nus supplichein da consultar las informaziuns che Vus anfleis sin la cuviarta e sil certificat pil dretg da votar.

Procedura per prender si tegias dalla vischnaunca

Culla fin digl onn current croda tenor il contract da fittaziun digl onn 2009 il temps da locaziun per las tegias che convischins e convischinas han priu si dalla vischnaunca.

Co succeda l'affittaziun dallas tegias dalla vischnaunca egl avegnir?

La suprastanza communal ei s'occupada en detagl cun l'affittaziun da tegias d'alp e ha decidiu da menar atras ina revisiun dalla lescha davart beins e dretgs immobiliars. Questa revisiun ei previda da tractar a caschun dalla proxima radunonza communal il december 2019. Consequentamein vegn la suprastanza communal a scriber ora las tegias el decuors dil meins schaner per la fittaziun naven ils 01-05-2020. Nus supplichein per enconuschientscha.

Sumvitg, 04-10-2019

Suprastanza communal Sumvitg

Curdem da gronda dimensiun

La vischnaunca organischescha ina rimnada da rufid bloccont sco suonda:

Venderdis, ils 18 d'october 2019 dallas 08.00 - 18.00 uras

Ei vegn rimnau il rufid per l'entira vischnaunca sin la piazza Igniu (spel baghetg economic)

Ils curdems ein da deponer els containers ni navettas tschentai sil plaz. Per tener-casa vegn priu encunter **max. 2 m³** rumians. Quantitads pli grondas, per ex. ord rumidas da casas e clavaus ein da transportar directamein e sin cuost dil caschunader ella deponia regiunala a Rueun. Rumians jamnils, q.v.d. rumians ch'ins dismetta el sac verd e rufid bloccont pign (dimensiuns max. 100 cm liung / 60 cm lad / 60 cm ault / peisa max. 30 kg) vegnan buca pri encunter. Tals rumians ein da plazzar als plazs da rimnada usitai els vitgs e che vegnan rimnai entras la Regiun Surselva mintgamai la mesjamna.

Ei vegn acceptau

- maschinas pintgas e mopeds mo cun tratg giu ieli e benzin,
- ferramenta, ferradira da tuttas sorts (meisas da fier, uaffens da fier, velos, e.a.v.),
- tut las maschinas electronicas (computers, frestgeras, maschinas da furar, pegnas d'electriche cun e senza ieli e.a.v.),
- mobiliar movibel (letg, scaffa, suppia, madrazza, teppi denton buca culau giu, e.a.v.),
- requisits per il temps liber e sport (skis, indrez da trenament, velos e.a.v.) ch'ei pli gronds che 100 cm liung / 60 cm lad / 60 cm ault ni pli grevs che 30 kg,
- per pneus senza gavegl vegn incassau ina taxa da frs. 5.--, cun gavegl frs. 10.--,
- per pneus da maschinas agricolas pintgas vegn incassau ina taxa da frs. 20.-- e per pneus da tracturs frs. 50.--,
- calzers da skis san vegnir dai giu en favur dalla ARGO Tavau per frs. 5.--.

Buca acceptau vegnan

- tuttas maschinas agricolas,
- lenna da brisch, lenna veglia, lenna da baghetg (tabliaus, plantschius, lattas, quaders, panos, e.a.v.),
- sacs da pupi e da plastic,
- materials da pachetar (palets, stiropor, plastic, e.a.v.),
- requisits per il temps liber e sport ch'ei pli pigns che 100 cm liung / 60 cm lad / 60 cm ault e pli levs che 30 kg (bob, scarsola, calzers da rodas, aissa-rulletta e.a.v.),
- blachas da ballas da silo (verdadas ed alvas),
- curdems da baghetg (linoleums, izolaziuns, plastics, folias da tetg e da preits, e.a.v.) e curdems da fatschentas,
- curdem verd da curtin e caglias, tals curdems san vegnir transportai sin la deponia verda ad Igniu,
- cartun e pupi duei vegnir surdau alla rimnada entras las scolas resp. las uniuns.

Ils suandonts rumians vegnan rimnai cun ils rumians jamnils e basegnan las marcas sco suonda:

- sacs tochen 50 kg; 1 marca da frs. 2.50,
- rumians pigns tochen 100 cm liung / 60 cm lad / 60 cm ault e pli levs che 12 kg; 2 marcas da frs. 2.50,
- rumians pigns tochen 100 cm liung / 60 cm lad / 60 cm ault entochen ina peisa da 30 kg; 3 marcas da frs. 2.50.

Nus appelein alla responsabladad da vischinas e vischins e supplichein da setener vid quellas directives en favur digl ambient. Medemamein fagein nus attents da buca deponer rumians sin deponias illegalas (selvadias). Talas deponias cunterfan alla legislaziun per la dismessa da rumians e vegnan annunziadas als organs responsabels e puni.

Per ulteriuras informaziuns stat il gerau responsabel bugen a Vossa disposiziun.

Uffeci forestal Sumvitg

Naven da gliendisdis, **ils 14 d'october 2019**, vegnan duas stortas dalla via d'uaul Glivers betunadas. Pertuccadas ein las stortas a Gutrusas e Cuolms da Tscheps. Per exequir las lavurs sto la via vegnir serrada naven dils Cuolms da Tscheps ensi per tut il traffic motorisau. La via resta era serrada sur notg e la fin d'jamna. A pei e cun velo eis ei pusseivel da passar. Las lavurs cuozan circa 3 – 4 jamnas.

Dapli informaziuns survegnis vus dil selvicultur da revier, Flurin Cathomas (079 681 19 67).
Engraziel per Vossa capientscha

Sumvitg, 04-10-2019

Uffeci forestal Sumvitg

Uffeci civil Surselva

Naschientscha

Schmied Aliya, naschida ils 12-09-2019 a Cuera, affon da David e Sabina Schmied, sesents a Rabius.

Sumvitg, 04-10-2019

Controlla da habitonts

Serrada dalla via Rosas

A partir dils 19 d'uost 2019 vegn il conduct d'aua dalla firma Axpo sanada sil tschancun denter Bogn Tenigia e Runcahez. Per exequir las lavurs sto la via da Rosas denter la Val Caho e la Val Camenisch vegnir serrada per tut il traffic motorisau. A pei e cun velo eis ei pusseivel da passar. Las lavurs cuozzan entochen la fin november 2019.

Dapli informaziuns survegnis vus tiel l'Axpo Hydro Surselva AG / Tavanasa tel. 081 929 25 11.
Engraziel per Vossa capientscha.

Sumvig, 04-10-2019

Axpo Hydro Surselva AG

Preparaziun sin temps d'unviern

Tenor art. 69 dalla lescha da baghegiar ei la vischnaunca autorisada da schar dismetter la neiv dils implonts publics d'avertura sil schischom privat cunfinont cun prender il duiv risguard sin baghetgs, implonts e cultiras. Per liung dallas vias publicas e privatas ein seivs demontablas ni implonts da tal gener d'allontanar. Ultra da quei ston caglias e roma vegnir tagliadas anavos aschia che la rumida da neiv vegn buca impedida.

Quellas lavurs da preparaziun sil temps d'unviern ston vegnir exequidas entochen alla fin d'october 2019. En cass d'omissiun refusescha la vischnaunca suenter la sesiun d'unviern scadins donn occuri ord la rumida da neiv.

Sumvitg, 04-10-2019

Departament traffic

Rumida da neiv 2019/2020

La vischnaunca exequescha era uonn puspei sin incarica la rumida da neiv per privats. L'indemnisaziun per quella lavur corrispunda allas cundiziuns che l'industria privata pretenda. Plinavon sto quella dismessa da neiv star anavos en prioritad alla rumida dils implonts publics d'avertura. Sche pusseivel duei l'incarica vegnir surdada alla vischnaunca mo leu nua che quella procura era la dismessa dallas vias cunfinontas. Vischinas e vischins che vulan schar exequir la vischnaunca la rumida da neiv da lur vias e parcadis privats duront gl'unviern proxim ein supplicai d'annunziar quei a scret ni per telefon entochen ils **31 d'october 2019** al cau dil menaschi stradal (tel. 079 638 18 19).

Sumvitg, 04-10-2019

Departament traffic

Cuminonza Pro S. Benedetg, Clavadi e contuorn

Invitaziun alla 15. radunonza generala ils 5 d'october 2019 allas 20.00 en l'ustria «Miraval»

Tractandas:

1. beneventaziun/appel
2. elecziun dils dumbravuschs
3. protocol ed approbaziun
4. rapport annual dil president
5. rapport dils cuitgs
6. rapport dalla cassa, dils revisurs/approbaziun
7. budget 2019–2020
8. program da lavur 2020
9. propostas dallas/dils commembras/-ers
10. varia

Plaid final dil president, star si legher ensemen tier revista da dias, sin stedia participaziun selegra *la suprastonza*

Uniuns da dunnas dalla vischnaunca da Sumvitg

Per tut tgi che ha plascher da zambergiar cun lenn (Schwemmholz) organisein nus in cuors cun dunna Theolinda Wolff.

Datum: **Gliendisdis, ils 21-10-2019**

Liug: Casa da scola Sumvitg

Informaziuns ed annunzias entochen ils 15-10-2019 tier Olivia Decurtins tel. 079 663 32 00

Sin stedia participaziun selegran las uniuns da dunnas.

Pro Senectute a Cumpadials

Meisa da miezdi (gentar communabel)

Pro Senectute Surselva organisescha ensemen cun Nadja Scolieri ell'Ustria dalla Staziun a Cumpadials ina meisa da miezdi (gentar communabel) inagada per meins, mintgamai il venderdis. Intent dalla meisa da miezdi duei esser da promover la cumminonza ella vischnaunca da Sumvitg e contuorn denter las personas ella vegliadetgna dalla pensiun. Plinavon dat ei la pusseivladad d'embellir quella occasiun cun star suentermiezdi da cumpignia cun dar in scart troccas ni auters giugs.

Liug: Ustria dalla Staziun, 7176 Cumpadials

Datum: venderdis, **ils 11 d'october 2019 allas 12.00**

Annunzias: Ein da far entochen mesjamna sera tier Ustria dalla Staziun, Cumpadials tel. 081 943 19 22